

摘藻堂四庫全書薈要

史部

欽定四庫全書蒼要卷五千五百十一

舊五代史卷一百十

宋門下侍郎參知政事監修國史薛居政等撰

周書第一

太祖紀一

太祖聖神恭肅文武孝皇帝姓郭氏諱威字文仲邢州堯山人也或云本常氏之子幼隨母適郭氏故冒其姓

焉

五代會要周  
號叔之後

高祖諱璟廣順初追尊為睿和皇帝廟

號信祖陵曰溫陵高祖妣張氏追謚睿恭皇后曾祖諱  
謹漢贈太保追尊為明憲皇帝廟號僖祖陵曰齊陵曾  
祖妣鄭國夫人申氏追謚明孝皇后祖諱蘊漢贈太傅  
追尊為翼順皇帝廟號義祖陵曰節陵

五代會要溫陵齊陵節陵皆無

陵所遙祖妣陳國夫人韓氏追謚翼敬皇后皇考諱簡  
申朝拜

漢贈太師追尊為章肅皇帝廟號慶祖陵曰欽陵皇妣  
燕國夫人王氏追謚為章德皇后后以唐天祐元年甲  
子歲七月二十八日生帝于堯山之舊宅載誕之夕赤

光照室有聲如爐炭之裂星火四迸帝生三歲家徙太原居無何皇考為燕軍所陷歿于王事帝未及齒配章德太后蚤世姨母楚國夫人韓氏提携鞠養及長形神魁壯趨向奇崛愛兵好勇不事田產天祐末潞州節度使李嗣昭常山戰歿子繼韜自稱留後南結梁朝據城阻命乃散金以募豪傑帝時年十八避吏故關依故人常氏遂往應募帝負氣用剛好鬪多力繼韜奇之或踰法犯禁亦多假借焉嘗遊上黨市有市屠壯健衆所畏

憚帝以氣凌之因醉命屠割肉小不如意叱之屠者怒  
坦腹謂帝曰爾敢刺我否帝即剗其腹市人執之屬吏  
繼韜惜而逸之其年莊宗平梁繼韜伏誅麾下牙兵配  
從馬直帝在籍中時年二十一帝性聰敏喜筆劄及從

軍旅多閱簿書軍志戎政深窮縈肯人皆服其敏嘗省  
昭義李瓊瓊方讀閩外春秋即取視之曰論兵也兄其

教我即授之深通義理

宋史李瓊傳唐莊宗募勇士即應募與周祖等十人約為兄弟

一日會飲瓊熟視周祖知非常人因舉酒祝曰凡我十  
人龍蛇混合異日富貴無相忘苟渝此言神降之罰皆

刺臂出血為誓周祖與瓊情好尤密嘗造瓊見其危坐讀書因問所讀何書瓊曰此閭外春秋所謂以正守國以奇用兵較存亡治亂記賢愚成敗皆在此也周祖令讀之謂瓊曰兄當教我自是周祖出入常袖以自隨遇暇輒讀每問難瓊謂瓊為師

天成初明宗幸浚郊時朱守殷嬰城拒

命帝從晉高祖一軍率先登城晉祖領副侍衛以帝長

於書計召置麾下令掌軍籍前後將臣無不倚愛初聖

穆皇后嬪于帝帝方匱乏而后多資從

東都事畧柴后資周太祖以金

帛使事嘗晝寢有小虺五色出入顴鼻之間后遽見愕

然在太原時有神尼與帝同姓見帝謂李瓊曰我宗天

上大仙頂上有肉角當為世界主清泰末晉起于河東  
時河陽節度使張彥琪為侍衛步軍都指揮使奉命北  
伐帝從之營於晉祠是時屋壞同處數人俱斃唯帝獨  
無所傷漢高祖為侍衛馬步都虞侯召置左右所居官  
舍之鄰吳氏有青衣佳娘者為山魃所魅鬼能人言而  
投瓦石鄰伍無敢過吳氏之舍者帝過之其鬼寂然帝  
去如故如是者再或謂鬼曰爾既神向者客來又何寂  
然鬼曰彼大人者繇是軍中異之范延光叛于魏命楊

光遠討之帝當行意不願從或謂帝曰楊公當朝重勲  
子不欲從何也帝曰楊公素無英雄氣得我何用能用  
我其劉公乎漢祖累鎮藩閫皆從之及鎮并門尤深待  
遇出入帷幄受心腹之寄帝亦悉心竭力知無不為及  
吐渾白可久叛入契丹帝勸漢祖誅白承福等五族得  
良馬數千匹財貨百萬計以資軍開運末契丹入汴晉  
帝北遷帝與蘇逢吉楊邠史弘肇等勸漢祖建號以副  
人望漢高祖即位晉陽時百度草創四方猶梗經綸締



構帝有力焉授權樞密副使檢校司徒漢高祖至汴正授樞密副使檢校太保乾祐元年春漢高祖不豫及大漸與蘇逢吉等同授顧命隱帝嗣位拜樞密使加檢校太尉舊制樞密使未加使相者不宣麻制至是宣之自帝始也

東都事略魏仁浦傳仁浦少為刀筆吏隸樞密院太祖問以卒乘數仁浦對曰帶甲者六萬太

祖喜曰天下事不足憂也

有頃河中李守貞據城反朝廷憂之諸大

臣共議進取之計史弘肇曰守貞河陽一客司耳竟何能為帝曰守貞雖不習戎行然善接英豪得人死力亦

勅敵宜審料之乃命白文珂常思率兵攻取師未至而趙思綰竊據永興王景崇反狀亦露朝廷遣郭從義王峻討趙思綰七月西面師徒大集未果進取其月十三日制授帝同平章事即遣西征以安慰招撫為名詔西面諸軍並取帝節度時論以白文珂常思非守貞之敵

聞帝西行羣情大愜

宋史李穀傳周祖討河中穀掌轉運時周祖已有人望潛貯異志屢

以諷穀穀但對以人臣當盡節奉上而已

八月六日帝發離京師二十日師

至河中

宋史庖彥珂傳周祖為樞密使總兵出征時議多以先討景崇思綰為便周祖意未決彥珂曰

三叛連衡推守貞為主宜先擊河中河中平則永興鳳翔失勢矣今捨近圖遠若景崇思綰逆戰于前守貞兵其後腹背受敵為之奈何周祖從其言

命白文珂營于河西帝營於河東

不數日周設長塹復築長連城以迫之帝在軍居常接賓客與大將譙語即褰衣博帶或遇巡城壘對陳敵幅巾短後與衆無殊臨矢石冒鋒刃必以身先與士伍分甘共苦稍立功效者厚其賜與微有傷痍者親為循撫士無賢不肖有所陳啟溫顏以接俾盡其情人之過忤未嘗介意故君子小人皆思効用守貞聞之深以為憂

十二月帝以蜀軍屯大散關即親率牙兵往鳳翔永興相度將發謂白文珂劉訥曰困獸猶鬪當謹備之帝至華州聞蜀軍退敗遂還二年正月五日夜李守貞遣將王三鐵領千餘人夜突河西砦果為劉訥等力戰敗之先是軍中禁酒帝有愛將李審犯令斬之以徇五月九日取河西砦主周光遜以砦及部衆千餘人來降十七日下令攻城會西北大風揚沙晦冥帝令禱河伯祠奠訖而風止自是晝夜攻之七月十三日帝率三砦將士

奪賊羅城二十一日城陷守貞舉家自焚而死帝前夢

河神告曰七月下旬上帝當滅守貞之族至是收復賊

壘城中人言見帝營上有紫氣如樓閣華蓋之狀

東都事略

王溥傳周太祖率兵討三叛以溥為從事三叛既平朝  
士及藩鎮嘗以書往來詞意涉于悖逆者太祖籍其名  
欲按之溥諫曰魑魅伺夜而出日月既照  
則氛沴消矣請焚之以安反側太祖從之  
二年八月五

日帝自河中班師其月二十七日入朝漢帝命升階撫  
勞酌御酒以賜之錫賚優厚翌日漢帝議賞勲欲兼方  
鎮帝辭之乃止帝以出征時廳子都七十三人具籍獻

之九月五日制加檢校太師兼侍中十月契丹入境前  
鋒至邢洺貝魏河北告急帝受詔率師赴北邊以宣徽  
南院使王峻為監軍其月十九日帝至邢州遣王峻前  
軍趨鎮定時契丹已退帝大閱欲臨邊境詔止之三年  
二月班師三月十七日制授鄴都留守樞密使如故時  
漢帝以北兵為患委帝以河朔之任宰相蘇逢吉等議  
藩臣無兼樞密使例史弘肇以帝受任之重苟不兼密  
務則難以便宜從事竟從弘肇之議詔河北諸州凡事

一稟帝節度帝將北行啟漢帝曰陛下富有春秋萬幾  
之事宜審于聽斷文武大臣乃心王室凡事諮詢即無  
敗失漢帝歛容謝之帝至鄴盡去煩弊之事不數月閭  
政有序一方晏然詔書褒美一夕在山亭院齋中忽有  
黃氣起于前上際于天帝于黃氣中見星文紫微文昌  
爛然在目既而告之星者曰予于室中見天象不其異  
乎對曰坐見天衢物不能隔至貴之祥也異日牙署中  
有紫氣起于幡竿龍首凡三日十一月十四日澶州節

度使李洪義侍衛步軍都指揮使王殷遣澶州副使陳光穗至鄴都報京師有變是月十三日旦羣小等害史弘肇等前一夕李業等遣心腹賁密詔至澶州令李洪義殺王殷又令護聖左廂都指揮使郭崇等害帝于鄴城十三日洪義受得密詔恐事不濟乃以密詔示王殷殷與洪義即遣陳光穗馳報于帝十四日帝方與宣徽使王峻坐議邊事忽得洪義文字遽歸牙署峻亦未知其事帝初知楊史諸公被誅神情惘然又見移禍及己



伸訴無所即集三軍將校諭之曰予從微至著輔佐國家先皇登遐親受顧託與楊史諸公彈壓經謀忘寢與食一旦無狀盡已誅夷今有詔來取予首級爾等宜奉行詔旨斷予首以報天子各圖功業且不累諸君也崇等與諸將校泣于前言曰此事必非聖意即是左右小人誣罔竊發假令此輩握重柄國得安乎宜得投論以判忠佞何事信單車之使而自棄千載之下空受惡名崇等願從明公入朝面自洗雪除君側之惡共安天下

衆然之遂請帝南行帝即嚴駕首途十六日至澶州王  
殷迎謁慟哭時隱帝遣小豎驚脫傾鄴軍所在為游騎  
所執帝即遣迴令附奏隱帝赴闕之由仍以密奏置驚  
脫衣領中奏曰臣發迹寒賤遭遇聖明既富且貴實過  
平生之望唯思報國敢有他圖今奉詔命忽令郭崇等  
殺臣即時俟死而諸軍不肯行刑逼臣赴闕令臣請罪  
上前仍言致有此事必是陛下左右譖臣耳今驚脫至  
此天假其便得伸臣心三五日當及闕朝陛下若以臣

有欺天之罪臣豈敢惜死若實有譖臣者乞陛下縛送  
軍前以快三軍之意則臣雖死無恨今託驚脫附奏以  
聞十七日帝至滑州節度使宋延渥開門迎納帝將發  
滑臺召將士謂之曰主上為讒邪所惑誅殺勲臣吾之  
此來事不獲已然以臣拒君寧論曲直汝等家在京師  
不如奉行前詔我以一死謝天子實無所恨將校前啟曰  
國家負公公不負國請公速行無遲久安邦雪怨正在  
此時既王峻諭軍曰我得公處分俟平定京城許爾等

旬日剽掠衆皆踴躍十九日隱帝遣左神武統軍袁義  
前鄧州節度使劉重進率禁軍來拒與前開封尹侯益  
等屯赤峒是夜俱退二十日隱帝整陣于劉子陂二十  
一日兩陣俱列慕容彥超率軍奪擊帝遣何福進王彥  
超李筠等大合騎以乘之慕容彥超退却死者百餘人  
于是南軍奪氣稍稍奔于北軍慕容彥超與數十騎東  
奔兗州吳虔裕張彥超等相繼來見帝是夜侯益焦繼  
勲潛至帝營帝慰勞遣還二十二日旦郭允明弒漢隱

帝于北郊初官軍之敗帝謂宋延渥曰爾國親可速往  
衛主上兼附奏請陛下得便速奔臣軍免為左右所圖  
及延渥至亂兵雲合即惶駭而還是旦帝望見天子旌  
旗于高坡之上謂隱帝在其下既免胄釋馬而前左右  
慮有不測請帝止帝泣曰吾君在此又何憂焉及至前  
隱帝已去矣帝歔歔久之俄聞隱帝遇賊號慟不已帝  
至玄化門劉銖雨射城外帝迴車自迎春門入諸軍大  
掠煙火四發帝止于舊第何福進以部下兵守明德門

翌日王殷郭崇言曰若不止剽掠比夜化為空城耳由是諸將部分斬其剽者至晡乃定帝與王峻詣太后宮起居請立嗣君乃以高祖姪徐州節度使贊入繼大統語在漢紀二十七日帝以嗣君未至請太后臨朝會鎮定州馳奏契丹入寇河北諸州告急太后命帝北征十二月一日帝發離京師四日至滑州駐馬數日會湘陰公遣使慰勞諸將受宣之際相顧不拜皆竊言曰我輩陷京師各各負罪若劉氏復立則無種矣或有以其言

告帝者帝愕然既時進途十六日至澶州是日旭旦日

邊有紫氣來當帝之馬首十九日下令諸軍進發二十

日諸軍將士大譟趨驛如墻而進帝閉門拒之軍士登

墻越屋而入請帝為天子亂軍山積登階陞陞扶抱擁

迫或有裂黃旗以被帝體以代赭袍山呼震地帝在萬

衆之中聲氣沮喪悶絕數四左右親衛星散竄匿帝即

登城樓稍得安息諸軍遂擁帝南行時河水初解浮梁

未構是夜北風凜烈比旦冰堅可渡諸軍遂濟衆謂之

凌橋濟竟水泮時人異之時湘陰公已駐宋州樞密使  
王峻在京聞澶州之變遣侍衛馬軍指揮使郭崇率七  
百騎赴宋州以衛湘陰公二十五日帝至七里店羣臣  
謁見遂營于臯門村二十七日漢太后令曰樞密使侍  
中郭威以英武之才兼內外之任剪除禍亂弘濟艱難  
功業格天人望冠世今則軍民愛戴朝野推崇宜總萬  
幾以允羣議可監國中外庶事並取監國處分二十八  
日監國教曰寡人出自軍戎本無德望因緣際會叨竊



寵靈高祖皇帝甫在經綸待之心腹洎登大位尋付重  
權當顧命之時受忍死之寄與諸勲舊輔立嗣君旋屬  
三叛連衡四郊多壘謬膺朝旨委以專征兼守重藩俾  
當勦敵敢不橫身戮力竭節盡心冀肅靜於疆場用保  
安於宗社不謂姦邪構亂將相連誅偶脫鋒鏑克平患  
難志安劉氏願報漢恩推擇長君以紹丕構遂奏太后  
請立徐州相公奉迎已在于道途行李未及于都輦尋  
以北面事急寇騎深侵遂領師徒徑往掩襲行次近鎮

已渡洪河十二月二十日將登澶州軍情忽變旌旗倒  
指喊叫連天引袂牽襟迫請為主環繞而逃避無所紛  
紜而逼脅愈堅頃刻之間安危莫保事不獲已須至徇  
從于是馬步諸軍擁至京闕今奉太后誥旨以時運艱  
危機務難曠俾令監國遜避無由僣倖遵承夙夜憂愧  
云時文武百官內外將帥藩臣郡守等相繼上表勸進  
三十日夜御營西北隅步軍將校因醉揚言昨澶州馬  
軍扶策今步軍亦欲扶策尋令虞侯詰其姓名昧旦擒

而斬之其一軍仍納甲仗遣中使監送就糧所

廣順元年春正月丁卯漢太后誥曰遠古已來受命相繼是不一姓傳諸百王莫不人心順之則興天命去之則廢昭然事迹著在典書予否運所丁遭家不造姦邪搆亂朋黨橫行大臣冤枉以被誅少主倉卒而及禍人自作孽天道寧論監國威深念漢恩切安劉氏既平亂略復正頽綱思固護于基扃擇繼嗣于宗室而獄訟盡歸於西伯謳謠不在于丹朱六師竭推戴之誠萬國仰

欽明之德鼎革斯契圖錄有歸予作佳賓固以為幸今  
奉符寶授監國可即皇帝位於戲天祿在躬神器自至  
允集天命永綏兆民敬之哉是日帝自臯門入大內御  
崇元殿即皇帝位制曰自古受命之君興邦建統莫不  
上符天意下順人心是以夏德既衰爰啟有商之祚炎  
風不競肇開皇魏之基朕早事前朝久居重位受遺輔  
政敢忘伊霍之忠仗鉞臨戎復委韓彭之任匪躬盡瘁  
焦思勞心討叛渙于河潼張聲援于岐雍竟平大憝粗

立微勞纔旋旆于關西尋統兵于河朔訓齊師旅固護  
邊陲只將身許國家不以賊遺君父外憂少息內患俄  
生羣小連謀大臣遇害棟梁既壞社稷將傾朕方在藩  
維以遭讒構逃一生於萬死徑赴闕庭梟四罪於九衢  
幸安區宇將延漢祚擇立劉宗徵命已行軍情忽變朕  
以衆庶所迫逃避無由扶擁至京尊戴為主重以中外  
勸進方岳推崇僣俛雖順于羣心臨御實慙於涼德改  
元建號祇率于舊章革故鼎新宜覃于霈澤朕本姬氏

之遠裔號叔之後昆積慶累功格天光表盛德既延于  
百世大命復集于眇躬今建國宜以大周為號可改漢  
乾祐四年為廣順元年自正月五日昧爽已前應天下  
罪人常赦所不原者咸赦除之故樞密使楊邠侍衛都  
指揮使史弘肇三司使王章等以勞定國盡節致君千  
載逢時一旦同命悲感行路憤結重泉雖尋雪于沈寃  
宜更伸于渥澤並可加等追贈備禮歸葬葬事官給仍  
訪子孫叙用其餘同遭枉害者亦與追贈馬步諸軍將

士等戮力叶誠輸忠効義先則平持內難後乃推戴朕躬言念勲勞所宜旌賞其原屬將士等各與等第超加恩命仍賜功臣名號已帶功臣者別與改賜應左降官未量移者與量移已量移者與復資已復資者量加叙錄亡官失爵之人宜與齒用配流徒役人並許放還諸處有犯罪逃亡之人及山林草寇等一切不問如赦到後一月不歸本業者復罪如初內外前任見任文武官寮致仕官各與加恩應在朝文武臣寮內諸司使諸道

行軍副使藩方馬步都指揮使如父母在未有恩澤者  
即與恩澤已有者更與恩澤如亡沒未曾追封贈者亦  
與封贈已封贈者更與封贈應天下州縣所欠乾祐元  
年二年已前夏秋殘稅及沿徵物色并三年夏稅諸色  
殘欠並與除放澶州已來官路兩邊共二十里內并乾  
祐三年殘稅欠稅並與除放應河北沿邊州縣自去年  
九月後來曾經契丹蹂踐處其人戶應欠乾祐三年終  
已前積年殘欠諸色稅物並與除放應係三司主持錢



穀敗闕場院官取乾祐元年終已前徵納外灼然無抵  
當者委三司分析聞奏天下倉場庫務宜令節度使專  
切鈐轄掌納官吏一依省條指揮不得別納斛餘秤耗  
舊來所進羨餘物色今後一切停罷應乘輿服御之物  
不得過為華飾宮闈器用務從朴素太官常膳一切減  
損諸道所有進奉以助軍國之費其珍巧纖華及奇禽  
異獸鷹犬之類不得輒有獻貢諸無用之物不急之務  
並宜停罷帝王之道德化為先崇飾虛名朕所不取苟

致治之未洽雖多端以奚爲今後諸道所有祥瑞不得  
輒有奏獻古者用刑本期止辟今茲作法義切禁非蓋  
承弊之時非猛則姦克難制及知勸之後在寬則典憲  
得宜相時而行庶臻中道今後應犯竊盜賊贓及和姦  
者並依晉天福元年已前條制施行應諸犯罪人等除  
反逆罪外其罪並不得籍沒家產誅及骨肉一依格令  
處分天下諸侯皆有親戚自可慎擇委任必當克効參  
裨朝廷選差理或未當宜矯前失庶叶通規其先于在

京諸司差軍將充諸州郡元從都押衙孔目官內知客等並可傳廢仍勒却還舊處職役近代帝王陵寢合禁樵採唐莊宗明宗晉高祖各置守陵十戶以近陵人戶充漢高祖皇帝陵署職員及守宮人時日薦饗并守陵人戶等一切如故仍以晉漢之冑為二王後委中書門下處分云司天上言今國家建號以木德代水淮經法國以姓基為臘請以未日為臘從之時議者曰昔武王勝殷歲集于房國家受命金木集于房文王厄羗里而

卦遇明夷帝脫于鄴大衍之數復得明夷則周為國號  
符于文武矣先是丁未年夏六月土金木火四星聚于  
張占者云當有帝王興于周者故漢祖建國由平陽陝  
服趨洛陽以應之及隱帝將嗣位封周王以符其事而  
帝以姬號之曹復繼宗周而天人之契炳然矣昔武王  
以木德王天下宇文周亦承木德而三朝皆以木代水  
不其異乎戊辰前曹州防禦使何福進受宣權許州節  
度使前復州防禦使王彥超受宣權徐州節度使前澶

州節度使李洪義受宣權宋州節度使己巳上漢太后

尊號曰昭聖皇太后是日詔有司擇日為故主發哀

五代

會要載原勅云漢高祖為義帝發喪魏明帝正禪陵尊號一時達禮千古所稱況朕久事前朝常參大政雖遷虞事夏見奪于羣情而四海九州咸知予夙志宜令所司擇日為故主舉哀仍備山陵葬禮

辛未有

司上言皇帝為故主舉哀日服縞素直領深衣腰經等

成服畢祭奠不視朝七日坊市禁音樂文武內外臣寮

成服後每日赴太平宮臨三日止七日釋服至山陵啟

攢塗日服初服輜車出城班辭釋服從之壬申前博州

刺史李筠受宣權滑州節度使癸酉樞密使檢校太傅  
王峻加同平章事以前澶州節度使李洪義為宋州節  
度使加同平章事以滑州節度使陳觀為左散騎常  
侍鄴都畱守判官王溥為左諫議大夫並充樞密院直  
學士以元從都押衙鄭仁誨為客省使知客押牙向訓  
為宮苑使北京畱守劉崇遣押牙鞏廷美致書求劉贊  
歸藩帝報曰朕在澶州之時軍情推戴之際先差來直  
省李光美備見必想具言而況遐邇所聞在後盡當知

悉湘陰公北在宋州駐泊見令般取赴京但勿憂疑必

令得所惟公在彼固請安心若能同力扶特別無顧慮

即當便封王爵永鎮北門鐵契丹書必無愛惜其諸情

素並令來人口宣遣千牛衛將軍朱憲充入契丹使先

是去年契丹永康王烏裕寇邢趙陷內邱及迴烏裕遣

使與漢隱帝書

通鑑契丹之攻內邱也死傷頗多又值月食軍中多妖異契丹主不敢深入引

兵還遣使使至境上會朝廷有蕭牆之變帝定京城迴

請和于漢

至澶州遇蕃使至遂與入朝至是遣朱憲伴送來使歸

蕃兼致書叙革命之由仍以金酒器一副玉帶一遺烏

裕晉州節度使王晏殺行軍司馬徐建以通河東間乙

亥鄆州節度使守太師兼中書令齊王高行周進位尚

書令襄州節度使檢校太師守太傅兼中書令齊國公

安審琦進封南陽王青州節度使檢校太師守太保兼

中書令魏國公符彥卿進封淮陽王夔州節度使侍衛

親軍馬步軍都指揮使檢校太傅王殷加同平章事充

鄴都留守典軍如故丙子帝赴太平宮為漢隱帝發喪



百官陪位如儀是日湘陰公元從右都押衙鞏廷美教  
練使楊溫等據徐州以拒命帝遣新授節度使王彥超  
率兵馳赴之仍賜廷美等勅書

通鑑帝復遺劉贊書曰  
爰念斯人盡心于主足

以賞其忠義何由責以悔尤俟新節度  
入城當各除刺史公何更以委曲示之丁丑荆南高保

融奏去年十一月朗州節度使馬希萼破潭州十二月

十八日縊殺馬希廣至十九日希萼自稱天策上將軍

武平靜江寧遠等軍節度使嗣楚王戊寅湘陰公殂己  
卯以前太師齊國公馮道為中書令弘文館大學士以

司徒兼門下侍郎同平章事弘文館大學士竇貞固為

侍中兼修國史以左僕射平章事集賢殿大學士蘇禹

珪為守司空平章事夏州節度使李彝興進封隴西郡

王荆南高保融進封渤海郡王靈武馮暉進封陳畱郡

王西京白文珂兗州慕容彥超鳳翔趙暉並加兼中書

令詔王彥超率兵攻徐州庚辰故樞密使左僕射平章

事楊邠追封恒農郡王故宋州節度使兼侍衛親軍都

指揮使史弘肇追封鄭王故三司使檢校太尉平章事

王章追封瑯琊郡王是日詔曰朕以眇末之身托于王公之上懼德弗類撫躬靡遑豈可化未及人而過自奉養道未方古而不知節量與其耗費以勞人曷若儉約而克己昨者所頒赦令已述至懷宮闈服御之所須悉從減損珍巧纖奇之厥貢並使寢停尚有未該再宜條舉應天下州府舊貢滋味食饌之物所宜除減其兩浙進細酒海味薑瓜湖南枕子茶乳糖白沙糖椒攬子鎮州高公米水梨易定栗子河東白社梨米粉菰豆粉玉

屑粃子麵永興御田紅杭米新大麥麵興平蘇栗子革  
州麝香羚羊角熊膽獺肝朱柿熊白河中樹紅棗五味  
子輕錫同州石鏤餅晉絳葡萄黃消梨陝府鳳栖梨襄  
州紫薑新筍橘子安州折粳米糟味青州水梨河陽諸  
雜果子許州御李子鄭州新筍鵝梨懷州寒食杏仁申  
州蘘荷亳州草薺泇淮州郡淮白魚如聞此等之物雖  
皆出于土產亦有取于民家未免勞煩率皆糜費加之  
力役負荷馳驅道途積于有司之中甚為無用之物今

後並不須進奉諸州府更有舊例所進食味其未該者

宜奏取進止又詔在朝文武臣寮各上封事凡有益國

利民之事速具以聞

通鑑詔曰朕生長軍旅不親學問未知治天下之道文武官有益國

利民之術各具封事以聞咸宜直書其事勿事辭藻

辛巳鎮州武行德晉州王晏

相州張彥成潞州常思邠州侯章並加兼侍中以侍衛

馬軍都指揮使果州防禦使檢校太保郭崇為洋州節

度使檢校太傅典軍如故以侍衛步軍都指揮使岳州

防禦使曹英為利州節度使檢校太傅典軍如故癸未

涇州史懿延州高允權滄州王景永興郭從義定州孫

方簡並加兼侍中鄜州楊信同州薛懷讓貝州王繼弘

並加同平章事乙酉華州王饒河中扈彥珂鄧州折從

阮邢州劉詞並加同平章事丙戌辛酉西莊潞州奏得石

會關使王延美報河東劉崇于正月十六日僭號丁亥

以前澶州節度使李洪義為宋州節度使加同平章事

以曹州防禦使北面行營馬步都排陣使何福進為許

州節度使加檢校太傅以博州刺史北面行營右廂排

陣使李筠為滑州節度使加檢校太保戊子有司上言  
准赦書以晉漢之冑為二王後其唐五廟仲祀合廢從  
之庚寅宗正寺奏請依晉漢故事遷漢七廟神主入昇  
平宮行仲享之禮以漢宗子為三獻從之

舊五代史卷一百十

舊五代史卷一百十考證

周太祖紀一八月六日帝發離京師二十日師至河中  
案五代春秋作七月郭威率師圍河中據此紀則  
周太祖以八月六日始發京師非七月即圍河中也  
是書漢隱帝紀與此紀互異考證見漢紀

城陷守貞舉家自焚而死 案歐陽史周本紀云守貞  
與妻子自焚死思綰景宗相次降今考是書漢紀五  
月乙丑趙思綰乞降七月甲子郭威奏收復河中守



貞自燔死是思綰之降在守貞自焚之前也又云三年正月趙暉奏收復鳳翔王景崇自燔死是景崇未嘗降也歐陽史漢本紀亦先載趙思綰降後書克河中王景崇傳亦作景崇自燔死紀傳前後自相矛盾當以是書為得其實

戊寅湘陰公殂 案歐陽史作十二月王峻遣郭崇以騎兵七百逆劉贇于宋州殺之通鑑作正月戊寅殺湘陰公于宋州

鳥裕舊作兀欲今改

舊五代史卷一百十考證

欽定四庫全書薈要卷五千五百十二

舊五代史卷一百十一

宋門下侍郎參知政事監修國史薛居正等撰

周書第二

太祖紀二

廣順元年春二月癸巳朔以樞密副使尚書戶部侍郎  
范質為兵部侍郎依前充職以陳州刺史判三司李穀  
為戶部侍郎判三司以右金吾大將軍充街使翟光鄴

爲左千牛衛上將軍充宣徽北院使以宣徽北院使袁  
義爲左武衛上將軍充宣徽南院使以左右金吾大將  
軍充街使符彥琳爲右監門上將軍丁酉以皇子天雄  
軍牙內都指揮使檢校右僕射貴州刺史榮起復爲澶  
州節度使檢校太保以右金吾上將軍薛可言爲右龍  
武統軍以左神武統軍安審約爲左羽林統軍以左驍  
衛上將軍趙贊爲右羽林統軍以太子太師致仕宋彥  
筠爲左衛上將軍詔移生吐渾族帳于潞州長子縣江

猪嶺己亥左武衛上將軍劉遂凝為左神武統軍以左  
衛上將軍焦繼勳為右神武統軍以左領軍衛上將軍  
史佺為右衛上將軍庚子故吳國夫人張氏追贈貴妃  
故皇第三女追封樂安公主故第二子青哥贈太保賜  
名侗第三子意哥贈司空賜名信故長婦劉氏追封彭  
城郡夫人皇姪三人守筠贈左領軍將軍改名愿奉超  
贈左監門將軍定哥贈左千牛衛將軍賜名遜故皇孫  
三人宜哥贈左驍衛大將軍賜名誼喜哥贈武衛大將

軍賜名誠三哥贈左領衛大將軍賜名誠辛丑西州回

鶻遣使貢方物前開封尹魯國公侯益進封楚國公前

西京留守莒國公李從敏進封秦國公前西京留守王

守恩進封莒國公癸卯以前中書侍郎兼戶部尚書平

章事李濤為太子賓客詔宣徽南院使袁義權知開封

府事以太子太保和凝為太子太傅丙午晉州王晏奏

河東劉崇遣偽招討使劉鈞副招討使白截海率步騎

萬餘人來攻州城以今月五日五道齊攻率州兵拒之

賊軍傷死甚衆

宋史王晏傳劉崇侵晉州晏閉關不出設伏城上并人以為怯競攀堞而登晏

麾伏兵擊之顛死者甚衆遂焚橋遁晏遣子漢倫追北數十里斬首百餘級

內出寶玉器及

金銀結縷寶裝牀几飲食之具數十碎之于殿庭帝謂

侍臣曰凡為帝王安用此仍詔所司凡珍華悅目之物

不得入宮先是回鶻間歲入貢禁民不得與蕃人市易

寶貨至是一聽私便交易官不禁詰丁未左千牛將軍

朱憲使契丹迴契丹主烏裕遣使郭濟獻良馬一駟賀

登極戊申詔曰朕祇膺景命奄有中區每思順物之情



從衆之欲將使照臨之下多寄食僦舍之徒歲月之間  
動懷土念家之思宜循大體用革前規應諸道州府有  
前資朝官居住如未赴京不得發遣其行軍副使已下  
幕職州縣官等得替求官自有月限年月未滿一聽外  
居如非時詔徵不在此限已酉有司議立四親廟從之  
辛亥以太子少傅楊凝式為太子少師以太常卿張昭  
為戶部尚書以尚書左丞王易為禮部尚書以兵部侍  
郎邊蔚為太常卿以翰林學士中書舍人魚崇諒為工

部侍郎充職以戶部侍郎韋勲為兵部侍郎以刑部侍郎邊歸讜為戶部侍郎以禮部侍郎司徒詡為刑部侍郎以秘書監趙上交為禮部侍郎以兵部尚書王仁裕為太子少保以翰林學士禮部尚書張沆為刑部尚書充職以尚書右丞田敏為左丞以吏部侍郎段希堯為工部尚書以太子詹事馬胤孫為太子賓客前鄜州節度使劉重進前滑州節度使宋延渥並加食邑吐渾府留後王全德加檢校太保充憲州刺史隰州刺史許遷

奏河東賊軍劉筠自晉州引兵來攻州城尋以州兵拒之賊軍傷死者五百人信宿遁去丁巳以尚書左丞田敏充契丹國信使迴鶻遣使貢方物己未天德軍節度使虢國公郭勳加同平章事以前宗卿劉暉為衛尉卿辛酉以衛尉卿邊光範為秘書監以前吏部侍郎李詳為吏部侍郎以前戶部侍郎顏衎為尚書右丞三月壬戌朔前西京留守李從敏卒戊辰以前左武衛上將軍李懷忠為太子太傅致仕以前邢州節度使安審暉為

太子太師致仕辛未幸南莊壬申詔曰諸州府先差散從親事官等前朝創置蓋出權宜苟便一時本非舊貫近者遍詢羣議兼採封章且言前件抽差于理不甚允當一則礙州縣之色役一則妨春夏之耕耘貧乏者困于供須豪富者幸于影庇既為煩擾須至改更況當東作之時宜罷不急之務其諸州所差散從親事官等並宜放散詔下公私便之徐州行營都部署王彥超馳奏收復徐州城內逆首楊溫及親近徒黨並處斬其餘無

名目人及本城軍都將校職掌吏民等雖被脅從本非同惡並釋放兼知自前楊溫招喚草賊同力守把朕以村野小民偶被扇誘念其庸賤特與含容其招入城草賊並放歸農仍倍加安撫湘陰公夫人并骨肉在彼仰差人安撫守護勿令驚恐以右散騎常侍張煦給事中王延藹並為左散騎常侍以前大名府少尹李瓊為將作監以前彰武軍節度使周密為太子太師致仕以衛尉卿劉暉充漢隱帝山陵都部署丙子以太子少保致

仕王延為太子少傅以戶部尚書致仕盧損左驍衛上將軍致仕李肅並為太子少保兵部尚書致仕韓昭肩為尚書右僕射太子太師致仕盧文紀為司空自延而下並依前致仕故散騎常侍裴羽贈戶部尚書故太子賓客蕭愿贈禮部尚書以司農卿致仕薛仁謙為鴻臚卿以將作監致仕烏昭為太府卿以太常少卿致仕王禧為少府監以秘書少監致仕段顥為將作監自仁謙而下並依前致仕詔沿淮州縣軍鎮今後自守疆土不

得縱一人一騎擅入淮南地分己卯潞州奏涉縣所擒  
河東將士二百餘人部送赴闕詔給衫袴巾屨放歸本  
土甲申鎮州武行德移鎮許州何福進移鎮鎮州丙戌  
以襄州節度副使郭令圖為宗正卿詔曰故蘇逢吉劉  
銖項在漢朝與朕同事朕自平禍亂不念仇讐尋示優  
弘與全家屬尚以幼穉無託衣食是艱將行矜卹之恩  
俾獲生存之路報怨以德非我負人賜逢吉骨肉洛京莊  
宅各一賜劉銖骨肉陝州莊宅各一己丑幸南莊庚寅

唐故郇國公李從益追封許王唐明宗淑妃王氏追贈  
賢妃辛卯詔諸道節度副使行軍司馬兩京少尹畱守  
判官並許差定當直人力不得過十五人諸府少尹書  
記支使防禦團練副使不得過十人節度推官防禦團  
練軍士判官不得過七人逐處係帳收管此外如敢額  
外影占人戶其本官當行朝典先是漢隱帝時有人上  
言州府從事令錄皆請料錢自合雇人驅使不合差遣  
百姓丁戶秉政者然之乃下詔州府從事令錄本處先



老職役並放歸農自是官更有獨行趨府縣者帝頗知之故有是命夏四月壬辰朔詔沿淮州縣許淮南人就淮北糴易餽糧時淮南饑故也甲午以夫人董氏為德妃仍令所司備禮冊命己亥改侍衛馬步軍軍額馬軍舊稱護聖今改為龍捷步軍舊稱奉國今改為虎捷壬寅詔唐莊宗明宗晉高祖三處陵寢各有守陵宮人並放逐便如願在陵所者依舊供給甲辰相州張彥成移鎮鄧州折從阮移鎮滑州李筠移鎮相州丙午亳州防

禦使王重胤卒戊申辛南莊庚戌皇第四女封壽安公主辛亥故許州節度使劉信追封蔡王丙辰詔曰牧守之任委遇非輕分憂之務既同制祿之數宜等自前有富庶之郡請給則優或邊遠之州俸料素薄以至遷除之際擬議亦難既論資叙之高低又患祿秩之升降所宜分多益寡均利同恩冀無黨無偏以勸勲効今定諸防禦使料錢二百貫祿粟一百石食鹽五石馬十匹草粟元隨三十人衣糧團練使一百五十貫祿粟七十石

鹽五石馬十匹元隨三十人刺史一百貫祿粟五十石

鹽五石馬五匹元隨二十人云丁巳尚書左丞田敏使

契丹迴契丹主烏裕遣使努瑚報命并獻碧玉金塗銀

裘鞍勒各一副弓矢器仗貂裘等土產馬三十匹土產

漢馬十匹庚申帝為故貴妃張氏舉哀于舊宮輟視朝

三日辛酉司空致仕盧文紀卒五月壬戌朔帝不視朝

以漢隱帝梓宮在殯故也戊寅皇子澶州節度使榮起

復依前澶州節度使以故貴妃張氏去歲薨至是發哀

故也已巳遣左金吾衛將軍姚漢英前右神武將軍華  
光裔使于契丹辛未太常卿邊蔚上追尊四廟謚議是  
夜有大星如五升器流于東北有聲如雷丙子太常卿  
邊蔚上太廟四室奠獻舞名丁丑詔京兆鳳翔府應諸  
色犯事人第宅莊園店磴已經籍沒者並給付罪人骨  
肉壬午幸南莊甲申考城縣巡檢供奉官馬彥勅棄市  
坐匿赦書殺獄囚也丙戌宰臣馮道為四廟冊禮使六  
月辛卯朔不視朝以漢隱帝梓宮在殯故也甲午百寮

上表請以七月二十八日皇帝降聖日為永壽節從之  
邢州大雨霖己亥太常少卿劉悅上漢少帝謚曰隱皇  
帝陵曰潁陵從之辛亥以樞密使王峻為尚書左僕射  
兼門下侍郎同平章事監修國史充樞密使以樞密副  
使尚書兵部侍郎范質為中書侍郎同平章事充集賢  
殿大學士以戶部侍郎判三司李穀為中書侍郎同平  
章事判三司司徒兼侍中監修國史竇貞固司空兼中  
書侍郎同平章事集賢殿大學士蘇禹珪並罷相守本

官壬子幸西莊癸丑詔宰臣范質參知樞密院事鄴都  
洺滄貝等州大雨霖丙辰西京奏新授宗正卿郭令圖  
卒丁巳以尚書左丞顏衎為兵部侍郎充端明殿學士  
以宣徽北院使崔光鄴兼樞密副使秋七月辛酉朔帝  
被袞冕御崇元殿授太廟四室寶冊于中書令馮道等  
赴西京行禮癸亥尚書左丞田敏兼判國子監事戊辰  
以御史中丞于德辰為尚書右丞以秘書監邊光範為  
太子賓客以戶部尚書張昭為太子賓客以其子秉為

陽翟簿犯法抵罪詔詣閣待罪詔釋之乃左授此官壬

申史官賈緯等以所撰晉高祖實錄三十卷少帝實錄

二十卷上之丙子幸宰臣王峻第己丑鎮州奏破河東

賊軍于平山縣西斬首五百級是日太常卿邊蔚奏議

改郊廟舞名事具樂志八月辛卯漢隱帝梓宮發引帝

詣太平宮臨奠詔羣臣出祖于西郊是歲幽州饑流人

散入滄州界詔流人至者口給斛粟仍給無主土田令

取便種蒔放免差稅癸己虎入西京修行寺傷人市民

殺之乙未幸班荆館壬寅契丹遣幽州牙將曹繼筠來

歸故晉中書令趙瑩之喪詔贈太傅仍賜其子絹五百

匹以備喪事歸葬于華陰故里乙巳幸西莊壬子晉州

王晏移鎮徐州滄州王景移鎮河中定州孫方簡移鎮

華州永興郭從義移鎮許州貝州王繼弘移鎮河陽李

暉移鎮滄州以許州節度使武行德為西京留守滑州

折從阮移鎮陝州河中扈彥珂移鎮滑州陝州李洪信

移鎮永興華州王饒移鎮貝州徐州王彥超移鎮晉州



丙辰尚食李氏等宮官八人並封縣君司記劉氏等六人並封郡夫人尚宮皇甫氏等三人並封國夫人唐制有內官宮官各有司存更不加郡國之號近代加之非舊典也以易州刺史孫行友為定州留後戊午故夫人柴氏追立為皇后仍令所司定謚備禮冊命九月庚申朔帝詣太平宮起居漢太后辛酉故夫人楊氏追贈淑妃仍令所司擇日備禮冊命故皇第五女追封永寧公主癸亥定州奏契丹永康王烏裕為部下所殺以前耀

州團練使武廷翰太子少保致仕丙子諸道兵馬都元帥兩浙節度使檢校太師尚書令中書令吳越國王錢俶可天下兵馬都元帥丁丑中書舍人劉濤責授少府少監分司西京坐遣男頊代草制詞也監察御史劉頊責授復州司戶坐代父草制也中書舍人楊昭儉解官放逐私便以多在假告不親其職也

舊五代史卷一百十一

舊五代史卷一百十一攷證

周太祖紀二相州張彥成 張彥成原本作彥威今据  
列傳改正

丙子幸宰臣王峻第 案丙子歐陽史作戊寅

癸亥定州奏契丹永康王烏裕為部下所殺 案遼史  
世宗以九月癸亥遇弒不應定州即能于癸亥入奏  
疑原文有舛誤

烏裕舊作兀欲今改 郭濟舊作骨支今改 努瑚舊

作耨姑今改

舊五代史卷一百十一攷證

欽定四庫全書薈要卷五千五百十三

舊五代史卷一百十二

宋門下侍郎叅知政事監修國史薛居正等撰

周書第三

太祖紀三

廣順元年冬十月己丑朔宰臣王峻獻唐張蘊古大寶  
箴謝偃惟皇誠德賦二圖詔報曰朕長于軍戎勤勞南  
北雖用心于鈐匱且無暇于詩書世務時艱粗經閱歷

前言徃行未甚討尋卿有佐命立國之勲居代天調鼎之任恒慮眇德未及古人于是采掇箴規弼諧寡昧披文閱理懌意怡神究為君治國之源審修已御人之要帝王之道盡在于茲辭翰俱高珠寶何貴再三省覽深用愧嘉其所進圖已令于行坐處張懸所冀出入看讀用為鑒戒壬辰潞州奏巡檢使陳思讓監軍向訓破河東賊軍于虜亭癸巳以刑部侍郎司徒詡為戶部侍郎以左散騎常侍張煦為刑部侍郎以給事中呂咸休為

左散騎常侍甲午絳州防禦使孫漢英卒辛丑荆南奏  
湖南亂大將軍陸孟俊執偽節度使馬希萼遷于衡州  
立希萼弟希崇為畱後將吏二千餘人遇害者半牙署  
庫藏焚燒殆盡乙巳詔併吏部三銓為一銓委本司長  
官通判丙午晉州巡檢王萬敢奏河東劉崇入寇營于  
州北辛亥潞州奏河東賊軍寇境乙卯荆南奏淮南遣  
鄂州節度使劉仁贍以戰船二百艘于今月二十五日  
入岳州丙辰詔樞密使王峻率兵援晉州丁巳以左衛



將軍申師厚為河西軍節度使檢校太保師厚素與王  
峻善及峻貴師厚羈旅無依日于峻馬前望塵而拜會  
西涼請帥帝令擇之無欲去者峻乃以師厚奏之師厚  
亦欣然求往尋自前鎮將授左衛將軍檢校工部尚書  
翼日乃有涼州之命賜旌節馳馬繒帛以遣之十一月  
己未朔荆南奏淮南大將邊鎬率兵三萬自袁州路趨  
潭州馬希崇遣從事送牌印納器仗鎬入城稱武安軍  
節度使馬氏諸族及將吏千餘人皆徙于金陵甲子夜

東南白虹亘天以新晉州節度使王彥超為晉絳行營  
馬軍都虞候乙丑命王峻出征晉州帝幸西莊以餞之  
甲戌日南至羣臣拜表稱賀甲申葬故貴妃張氏丁亥  
詔唐朝五廟舊在至德宮安置應屬徽陵莊田園舍宜  
令新除右監門將軍李重玉為主其緣陵緣廟法物除  
合畱外所有金銀器物充遷葬故淑妃王氏及許王從  
益外其餘竝給與重玉及尼惠英惠燈惠能惠嚴等令  
重玉以時祀陵廟務在豐潔重玉故皇城使李從琛之

子明宗之孫惠英等亦明宗親屬也故帝授重玉官秩  
令主先祀卹王者之後也十二月戊子朔詔以劉崇入  
寇取當月三日暫幸西京庚寅詔巡幸宜停時王峻駐  
軍陝府聞帝西巡遣使馳奏不勞車駕順動帝乃止乙  
未幸西莊兗州慕容彥超上言乞朝覲詔允之尋稱部  
內草寇起不敢離鎮戊申鄆州奏慕容彥超據城反已  
酉王峻奏劉崇逃遁王師已入晉州

宋史陳思讓傳王峻授晉州以思讓

與康延昭分為左右兩排陣使令率軍自高廟路至絳州與大軍合崇燒營遁去思讓又與藥元福襲破之

廣順二年春正月戊午朔不受朝賀以宿兵在外故也

庚申王峻奏起近鎮丁夫二萬城晉州壬戌修東京羅

城凡役丁夫五萬五千人兩旬而罷甲子以侍衛步軍都

指揮使曹英為兗州行營都部署以齊州防禦使史延

韜為副都署以皇城使向訓為兵馬都監陳州防禦使

藥元福為馬步都虞候率兵討慕容彥超

隆平集慕容彥超盜據兗

海周祖命曹英為帥向訓副之參用藥元福以兵從謂

元福曰已勅英訓勿以軍禮見汝及元福至英訓皆父

事諸軍入兗州界不得下路停止村舍犯者以軍法從

事丙寅徐州巡檢供給官張令彬奏破淮賊于沭陽斬首千餘級擒賊將燕敬權時慕容彥超求援于淮南淮南偽主李景發兵援之師于下邳聞官軍至退趨沭陽遂破之庚午高麗權知國事王昭遣使貢方物壬申鎮州何福進差人部送先擒獲到河東賊軍二百餘人至闕下詔給巾履衫袴以釋之戊寅徐州部送沭陽所獲賊將燕敬權等四人至闕下詔賜衣服金帛放歸本土敬權等感泣謝罪帝召見謂之曰夫惡兇邪獎忠順天

下一也我之賊臣撓亂國法嬰城作逆殃及生靈不意  
吳人助茲凶惡非良算也爾當歸言之于爾君初漢末  
遣三司軍將路昌祚于湖南市茶屬淮南將邊錫陷長  
沙昌祚被賊送金陵及敬權自大朝歸具以帝言告于  
李景景乃召昌祚延坐從容久之且稱美大朝皇帝聖  
德廣被恩沾鄰土深有依附國家之意及罷遣偽宰相  
宋齊邱宴昌祚于別館又令訪昌祚在湖南遭變之時  
亡失綱運之數命依數償之給茗薺萬八千斤遣水運

至江夏仍厚給行裝遣之歸闕二月庚寅府州防禦使折德辰奏河東賊軍寇境率州兵破之斬首二千級辛卯太白經天癸巳以權知高麗國事王昭為高麗國王庚子府州防禦使折德辰奏收河東界岢嵐軍癸卯詔先獲河鄉軍一百餘人各給錢鞋放歸鄉里壬子太子太師致仕安審暉卒三月庚申幸南莊令從臣習射戊辰以樞密院直學士左諫議大夫王溥為中書舍人充翰林學士以內客省使恩州團練使鄭仁誨為樞密

副使詔宣徽北院使翟光鄴權知永興軍府事甲戌回  
鶻遣使貢方物庚辰詔西京莊宅司內侍省宮苑司內  
園等四司所管諸巡係稅戶二千五百竝還府縣其廣  
德昇平二宮竝停廢應行從諸莊園林亭殿房舍什物  
課利宜令逐司依舊收管夏四月丙戌朔日有食之帝  
避正殿百官守司丁亥詔停蔡州鄉軍戊子以京師旱  
分命羣臣禱雨癸巳制削奪慕容彥超在身官爵甲午  
高麗國冊使衛尉卿劉皞卒乙卯詔取來月五日車駕



赴兗州城下慰勞將士以樞密副使鄭仁誨為右衛大將軍依前充職兼權大內都點檢以中書侍郎平章事判三司李穀為權東京留守兼判開封府事五月丙辰朔帝御崇元殿受朝仗衛如儀庚申車駕發京師戊辰至兗州城下乙亥收復兗州斬慕容彥超夷其族詔端明殿學士顏衍權知兗州軍州事壬午曲赦兗州管內罪人取五月二十七日已前所犯罪大辟已下咸赦除之慕容彥超徒黨有逃避潛竄者及城內將吏等竝放

罪自慕容彥超違背已來鄉城內有接便為非者一切

不問諸軍將士歿于王事者各與賻贈都頭已上與贈

官兗州城內及官軍下寨四面去州五里內今年所徵夏

秋稅及沿徵錢物竝放十里內只放一州管界今夏苗

子三分放一分城內百姓遭毀拆舍屋及遭燒焚者給

賜材木諸處差到人夫內有遭矢石死者各給絹三匹

仍放戶下三年徭役云癸未詔兗州降為防禦州仍為

望州六月乙酉朔帝幸曲阜縣謁孔子祠既奠將致拜

左右曰仲尼人臣也無致拜帝曰文宣王百代帝王師  
也得無敬乎卽拜奠于祠前其所奠酒器銀鑪竝留于  
祠所遂幸孔林拜孔子墓帝謂近臣曰仲尼亞聖之後  
今有何人對曰前曲阜令襲文宣公孔仁玉是仲尼四  
十三代孫有鄉貢三禮顏涉是顏淵之後卽召見仁玉  
賜緋口授曲阜令顏涉授主簿便令視事仍勅兗州修  
葺孔子祠宇墓側禁樵採丙戌車駕還京初帝以五月  
十三日至兗州賊尚拒守至十七日晝夢道士一人進

書卷首云車駕來月二日還京其下文字絕多不能盡  
記既寤以夢告宰臣又四日而城拔帝至軍凡駐蹕九  
日而賊平果以六月二日發離城下近代親征克捷無  
如此之速也是日大雨城下行宮水深數尺其日晚至  
中都縣帝笑謂侍臣曰今日若不離城下則當為潦所  
溺矣戊戌車駕至自兗州辛丑以靈武節度使馮暉卒  
輟視朝一日壬寅前翰林學士李澣自契丹中上表陳  
奏機事且言偽幽州節度使蕭海貞欲謀嚮化帝甚嘉

之

宋史李幹傳海貞與幹相善幹來問諷海貞以南歸

之計海貞納之周廣順二年幹因定州孫方諫密表

言契丹衆微之勢周祖嘉焉遣諜者田重霸覈詔慰撫

仍命幹通信幹復表述契丹主幼弱多寵好擊鞠大臣

離貳若出師計伐因與通好乃其

癸卯德妃董氏薨乙

時也屬中原多故不能用其言

已詔宣徽南院使袁義判開封府事辛亥以朔方軍衙

內都虞候馮繼業起復為朔方軍兵馬畱後甲寅辛舊

宅為德妃舉哀故也秋七月丙辰詔內外臣僚每遇永

壽節舊設齋供今後中書門下與文武百官共設一齋

侍衛親軍都指揮使已下共設一齋樞密使內諸司使

已下共設一齊其餘前任職員及諸司職掌更不得開設道場及設齋是日大風雨破屋拔樹尚書省都堂有龍穿屋壞獸角而去西壁有爪迹存焉襄州大水丁卯詔復升陳州曹州為節鎮以侍衛馬軍都指揮使洋州節度使郭崇為陳州節度使以侍衛步軍都指揮使曹英為曹州節度使竝典軍如故以陳州防禦使藥元福為晉州節度使辛未詔相州節度使李筠權知潞州軍州事丙子以小底都指揮使漢州刺史李重進為大內

都點檢兼馬步都軍頭領恩州團練使以內殿直都知  
駙馬都尉張永德領和州刺史充小底第一軍都指揮  
使八月甲申朔翰林學士刑部尚書張沆落職守本官  
以中書舍人史館修撰判館事徐台符為禮部尚書充  
翰林學士承旨以兵部侍郎韋勲為尚書右丞以尚書  
右丞于德辰為吏部侍郎以戶部侍郎邊歸謙為兵部  
侍郎以禮部侍郎趙上交為戶部侍郎以樞密直學士  
左散騎常侍陳觀為工部侍郎依前充職以刑部侍郎

景範為左司郎中充樞密直學士乙酉樞密使王峻上  
章請解樞衡凡三上章詔不允庚寅潁州奏先于淮南  
俘獲孳畜已準詔送還本土甲午詔止絕吏民詣闕舉  
請刺史縣令賜宰臣李穀白藤肩輿時穀以今年七月  
因步履傷臂請告數旬詔穀扶持三司刻名印署事仍  
放朝參庚子潞州節度使常思移鎮宋州相州節度使  
李筠移鎮潞州壬寅鄆州節度使高行周薨癸丑詔改  
鹽麴法鹽麴犯五斤已上處死煎鹽者犯一斤已上



處死先是漢法不計斤兩多少竝處極刑至是始革之  
九月庚午以大理卿劇可久為太僕卿以左庶子張仁  
瑒為大理卿以司天監趙延乂為太府卿兼判司天監  
事詔北面沿邊州鎮自守疆場不得入北界俘掠乙亥  
鎮州奏契丹入深冀州遣龍捷都指揮使劉誨牙內都  
指揮使何繼筠等率兵拒之而退時契丹聞官軍至掠  
冀部丁壯數百隨行狼狽而北冀部被擄者望見官軍  
鼓譟不已官軍不敢進其丁壯盡為蕃軍所殺而去丁

丑以鄭州防禦使白重贊為相州畱後戍寅樂壽都監  
杜延熙奏于瀛州南殺敗契丹斬首三百級獲馬四十  
七匹癸未帝姨母韓氏追封楚國夫人故第四姊追封  
福慶長公主易州奏契丹武州刺史石越來奔冬十月  
丙戌以前晉州節度使王彥超為河陽節度使庚寅詔  
諸州罷任或朝覲竝不以器械進貢先是諸道州府各  
有作院每月課造軍器逐季搬送京師進納其遂州每  
年占畱係省錢帛不少謂之甲料仍更于部內廣配土

產物徵斂數倍民甚苦之除上供軍器外節度使刺史

又私造器甲以進貢為名功費又倍悉取之于民帝以

諸州器甲造作不精兼占畱屬省物用過當乃令罷之

仍選擇諸道作工赴京作坊以備役使乙未永興軍奏

宣徽北院使知軍府事翟光鄴卒丁酉葬德妃廢朝戊

戌以宣徽南院使袁義權知永興軍府事以樞密直學

士工部侍郎陳觀權知開封府事己亥升鉅野縣為濟

州以樞密院副使鄭仁誨為宣徽北院使兼樞密副使

庚子幸樞密院王峻請之也甲辰宰臣李穀以臂傷未  
愈上表辭位凡三上章詔報不允丁未滄州奏自十月  
已前蕃歸漢戶萬九千八百戶是時北境饑饉人民轉  
徙襁負而歸中土者散居河北州縣凡數十萬口十一  
月丙辰荆南奏朗州大將劉言以今年十月三日領兵  
趨長沙十五日至潭州淮南所署湖南節度使邊鎬岳  
州刺史宋德權竝棄城遁去庚申以前少府監馬從斌  
為殿中監壬戌樞密使王峻亡妻崔氏追封趙國夫人

非故事也乙丑刑部尚書張沆卒辛未陝州折從阮移鎮邠州以前宋州節度使李洪義為安州節度使癸酉青州符彥卿移鎮鄆州甲戌詔曰累朝以來用兵不息至于繕治甲冑未免配役生靈多取于民助成軍器就中皮革尤峻科刑稍犯嚴條皆抵極典鄉縣以之生事姦滑得以侵漁宜立所規用革前弊應天下所納牛皮今將逐所納數三分內減二分其一分于人戶苗畝上配定每秋夏苗共十頃納連角皮一張其黃牛納乾筋

四兩水牛半斤犢子皮不在納限牛馬驢騾皮筋角今  
後官中更不禁斷只不得將出化外敵境州縣先置巡  
檢牛皮節級並停丙子詔曰應内外文武官祭幕職州  
縣官舉選人等今後有父母祖父母亡歿未經遷葬者  
其主家之長不得輒求仕進所由司亦不得申舉解送  
如是卑幼在下者不在此限己卯日南至帝御崇元殿  
受朝賀仗衛如儀十二月丙戌權武平軍畱後劉言遣  
牙將張崇嗣入奏于十月十三日與節度副使王進達

行軍司馬何敬貞指揮使周行逢等同共部領戰棹攻  
收湖南偽節度使邊鎬當夜出奔王進達等已入潭州  
九國志王進達傳朗州武陵人或名進達邊鎬為武安軍  
節度使召劉言入覲言不行謀于進達曰江南召我不往  
必加兵于我矣為之奈何進達曰鎬之此來以制置潭朗  
為名公如速行入其算武陵負江湖之阻帶甲百萬乃  
欲拱手臣異姓乎鎬新至長沙經略未定乘人心憤怒  
引兵攻鎬司一鼓而擒也言然之乃遣與何景真等同  
起兵于武陵號十指揮使以攻邊鎬達率舟師南上至  
長沙邊鎬大駭以所部奔歸江南諸州屯守皆罷之盡  
復湖外之地

癸巳太子太師致仕安叔千卒甲午詔今後諸  
候入朝不得進奉貢宴丁酉皇子澶州節度使榮落起

復加同平章事戊戌太子少傅致仕王延卒壬寅幸西  
莊乙巳以端明殿學士顏衍權知開封府事御史臺奏  
請改左右威衛復為左右屯衛從之避御名也是冬無  
雪

廣順三年春正月壬子朔帝御崇元殿受朝賀仗衛如  
儀幸太平宮起居漢太后甲寅賜羣臣射于內鞠場乙  
卯武平軍兵馬畱後劉言奏潭州干戈之後焚燒殆盡  
乞移使府于武陵從之詔升朗州為大都督府在潭州



之上丙辰以武平節度使畱後檢校太尉劉言為檢校  
太師同平章事行朗州大都督充武平軍節度兼三司  
水陸轉運等使制置武安靜江等軍事進封彭城郡公  
武平軍節度副使權知潭州軍州事檢校太傅王進達  
為檢校太尉行潭州刺史充武安軍節度使以武安軍  
行軍司馬兼衙內步軍都指揮使檢校太傅何敬貞為  
檢校太尉行桂州刺史充靜江軍節度使以張儼領峒  
州刺史充武平軍節度副使以朱元琇領黃州刺史充

靜江軍節度副使以周行逢領集州刺史充武安軍節度行軍司馬自進達而下皆劉言將校也邠州奏慶州略蕃部野雞族略奪商旅侵擾州界詔遣寧州刺史張建武等率兵掩襲仍先賜勅書安撫如不從命卽進軍問罪辛酉詔賜朗州劉言應兩京及諸道舊屬湖南樓店邸第乙丑詔諸道州府係屬戶部營田及租稅課利等除京兆府莊宅務贍國軍權鹽務兩京行從莊外其餘並割屬州縣所徵租稅課利官中只管舊額其職員

節級一切停廢應有客戶元佃係省莊田桑土舍宇便  
賜逐戶充為永業仍仰縣司給與憑由應諸處元屬營  
田戶部院及係縣人戶所納租牛課利起今年後並與  
除放所有見牛犢並賜本戶官中永不收係云帝在民  
間素知營田之弊至是以天下係官莊田僅萬計悉以  
分賜見佃戶充永業是歲出戶三萬餘百姓既得為己  
業比戶欣然于是葺屋植樹敢致功力又東南郡邑各  
有租牛課戶徃因梁太祖渡淮軍士掠民牛以千萬計

梁太祖盡給與諸州民輸租課自是六十餘載時移代改牛租猶在百姓若之至是特與除放未幾京北府莊宅務及權鹽務亦歸州縣依例處分或有上言以天下係官莊田甚有可惜者若遣貨之當得三十萬緡亦可資國用帝曰苟利于民與資國何異丁卯戶部侍郎權知貢舉趙上交奏諸科舉人欲等第各加封義場數進士除詩賦外別試雜文一場從之兩浙弔祭使左諫議大夫李知損責授登州司馬員外置仍令所在馳驛放遣

知損銜命江浙所經藩郡皆強貸于候伯為青州知州  
張凝所奏故有是命己巳辛南莊臨水亭見雙鳧戲于  
池上帝引弓射之一發疊貫從臣稱賀庚午以前邠州  
節度使候章為鄧州節度使前萊州刺史葉仁魯賜死  
坐為民所訟故也辛未詔樞密使王峻巡視河隄峻請  
行故從之辛巳辛南莊閏月甲申朗州劉言潭州王進  
達奏廣賊占據桂管深入永州界俘劫遣朗州行軍司  
馬何敬貞與指揮使朱全琇陳順等率水陸軍五萬進

擊丙戌回鶻遣使貢方物詔故梁祖庸使趙巖姪崇勳  
見居陳州量賜係官店宅從王峻之請也辛卯定州奏  
契丹攻義豐軍出勁兵夜斫蕃營斬首六十級契丹遁  
去甲午鎮州奏契丹入境遣兵追襲至無極而還丙申  
皇子澶州節度使榮來朝壬寅以樞密使尚書左僕射  
同平章事監修國史王峻兼青州節度使餘如故延州  
衙內指揮使高紹基奏言父允權患腳膝令臣權知軍  
州事癸卯陳州奏吏民請與前刺史李穀立祠堂從之

時穀為宰相聞郡人陳請遜讓數四乃止甲辰鄴都畱  
守王殷加檢校太尉依前同平章事丙午鎮州節度使  
何福進河陽節度使王彥超竝加檢校太尉潞州節度  
使李筠加檢校太傅丁未延州節度使高允權卒己酉  
開封府奏都城內錄到無名額僧尼寺院五十八所詔  
廢之二月辛亥朔以前西京畱守白文珂為太子太師  
致仕進封韓國公癸丑安州節度使李洪義侍衛馬軍  
都指揮使郭崇侍衛步軍都指揮使曹英竝加檢校太

尉唐州方城縣令陳守愚棄市坐剋畱戶民蠶鹽一千五百斤入已也內制國寶兩坐詔中書令馮道書寶文其一以皇帝承天受命之寶為文其一以皇帝神寶為文案傳國寶始自秦始皇令李斯篆之歷代傳授事具前史至唐末帝自燔之際以寶隨身遂俱焚焉晉高祖受命特製寶一座開運末北戎犯闕少帝遣其子延煦送于戎王戎王訝其非真少帝上表具訴其事及戎王北歸賁以入蕃漢朝二帝未暇別製至是始創為之庚



申遣將作監李瓊知陝州軍州事甲子樞密使平盧軍  
節度使尚書左僕射平章事監修國史王峻責授商州  
司馬員外置所在馳驛發遣戊辰左監門上將軍李建  
崇卒延州牙內都指揮使高紹基奏交割軍府與副使  
張圖已巳朗州劉言秦當道先遣行軍司馬何敬貞率  
兵掩擊廣賊行及潭州部衆奔潰湖南王進達以敬貞  
失律已梟首訖以樞密直學士工部侍郎陳觀為祕書  
監壬申鳳翔少尹桑維翰能責授鄧州長史能晉相維翰之

庶弟也坐據維翰別第為人所訟故也癸酉以戶部侍郎知貢舉趙上交為太子詹事是歲新進士中有李觀者不當策名物議諠然中書門下以觀所試詩賦失韻勾落姓名故上交移官丁丑幸南莊賜從官射命客省使向訓權知延州軍州事

舊五代史卷一百十二

舊五代史卷一百十二攷證

周太祖紀三庚申車駕發京師 案五代春秋作庚辰  
帝東征歐陽史從是書作庚申

戊戌車駕至自兗州 案歐陽史作庚子至自兗州五  
代春秋從是書作戊戌

節度副使王進達 王進達原本作進達後又作王達  
攷九國志王達或名進達今攷歸畫一

官中只管舊職 官中訛官中今據下文改正

遣兵追襲至無極而還 案契丹國志作無極山是書  
無山字當係史家省文今姑仍其舊

舊五代史卷一百一十二攷證

欽定四庫全書薈要卷五千五百十四

舊五代史卷一百十三

宋門下侍郎參知政事監修國史薛居正等撰

周書第四

太祖紀四

廣順三年春三月庚辰朔以相州畱後白重贊為滑州  
節度使以鄭州防禦使王進為相州節度使以前兗州  
防禦使索萬進為延州節度使以亳州防禦使張鐸為

同州節度使甲申以皇子澶州節度使榮為開封尹兼

功德使封晉王仍令所司擇日備禮冊命丙戌以宣徽

北院使兼樞密副使鄭仁誨為澶州節度使以殿前都

指揮使李重進領泗州防禦使以客省使向訓為內客

省使己丑以棣州團練使王仁鎬為右衛大將軍充宣

徽北院使兼樞密副使庚寅端明殿學士尚書兵部侍

郎顏衍落職守本官

宋史顏衍傳衍權知開封府王峻敗罷職守兵部侍郎

以翰

林學士中書舍人王溥為戶部侍郎充職以左司郎中

充樞密直學士景範為左諫議大夫充職祕書監陳觀  
責授左贊善大夫畱司西京坐王峻黨也癸巳大風雨  
土戊申幸南莊夏四月甲寅禁沿邊民鬻兵仗與蕃人  
戊辰河中節度使王景移鎮鳳翔宋州節度使常思進  
移鎮青州鳳翔節度使趙暉移鎮宋州河陽節度使王  
彥超移鎮河中賜朗州劉言綰三百匹以兵革之後匱  
乏故也詔在京諸軍將士持支救接五月己卯朔帝御  
崇元殿受朝賀仗衛如儀辛巳前慶州刺史郭彥欽勒



歸私第國初以彥欽再刺慶州兼掌權鹽彥欽擅加權  
錢民夷流怨州北十五里寡婦山有蕃部曰野雞族彥  
欽作法擾之蕃情獷悍好為不法彥欽乃奏野雞族掠  
奪綱商帝遣使賫詔撫諭望其率化蕃人既苦彥欽貪  
政不時報命朝廷乃詔邠州節度使折從阮寧州刺史  
張建武進兵攻之建武勇于立功徑取野雞族帳擊殺  
數百人又殺牛族素與野雞族有憾且聞官軍討伐相  
聚餉饋欣然迎奉官軍利其財貨孳畜遂劫奪之翻為

族所誘至包山負險之地官軍不利為蕃人迫逐投崖  
墜澗而死者數百人從阮等以兵自保不相救應帝怒  
彥欽及建武俱罷其任及彥欽至京師故有是命丁亥  
新授青州節度使常思進在宋州日出放得絲四萬一  
千四百兩請徵入官詔宋州給還人戶契券其絲不徵  
甲午中書侍郎同平章事集賢殿大學士權判門下省  
事范質可權監修國史六月壬子滄州奏契丹幽州權  
鹽制置使兼防州刺史知盧臺軍事張藏英以本軍兵

士及職員戶人孳畜七千頭口歸化癸丑以前開封尹  
楚國公侯益為太子太師以前西京畱守莒國公王守  
恩為左衛上將軍以前永興軍節度使李洪信為左武  
衛上將軍甲寅以左衛上將軍宋彥筠為太子少師以  
太子少師楊凝式為尚書右僕射致仕癸亥前河陽節  
度使王繼弘卒己巳太子太傅李懷忠卒是月河南河  
北諸州大水霖雨不止川陂漲溢襄州漢水溢入城深  
一丈五尺居民皆乘筏登樹羣鳥集潞州河南無鳥秋

七月戊寅朔徐州言龍出豐縣村民井中即時澍雨漂  
沒城邑癸未太子賓客馬裔孫卒甲申鄴都王殷奏乞  
朝覲凡三上章允之尋以北邊奏契丹事機詔止其行  
以左金吾上將軍安審信為太子太師致仕丁亥以右  
金吾上將軍張從恩為左金吾上將軍以前鄧州節度  
使張彥成為右金吾上將軍己丑以虎捷左鑲都指揮  
使永州防禦使韓通為陝州畱後庚寅太府卿判司天  
監趙延乂卒辛卯以前西京副畱守盧價為太子賓客

乙未以御史中丞邊光範為禮部侍郎以刑部侍郎張  
煦為御史中丞以翰林學士承旨尚書禮部侍郎徐台  
符為刑部侍郎充職丙申太子太師致仕安審信卒丁  
酉詔曰京兆鳳翔府同華邠延鄜耀等州所管州縣軍  
鎮頃因唐末藩鎮殊風久歷歲時未能釐革政途不一  
何以教民其婚田爭訟賦稅丁徭合是令佐之職其擒  
姦捕盜庇護部民合是軍鎮警察之職今後各守職分  
專切提撕如所職疎遣各行按責其州府不得差監微

軍將下縣戊戌衛尉少卿李溫美責授房州司戶參軍  
溫美奉使祭海便道歸家家在壽光縣為縣吏馮勳所  
訟故黜之供奉官武懷贊棄市坐盜馬價入已也壬寅  
以鴻臚少卿趙修已為司天監八月己酉幸南莊丙辰  
內衣庫使齊藏珍除名配沙門島藏珍奉詔修河不于  
役所部轄私至近縣止宿及報隄防危急安寢不動遂  
致橫流故有是責庚申邢州節度使劉詞移鎮河陽辛  
酉以龍捷左鑲都指揮使閻州防禦使田景咸為邢州

畱後丁卯河決河陰京師霖雨不止給賜諸軍將士薪芻有差癸酉以翰林學士戶部侍郎王溥為端明殿學士甲戌潭州王進達奏朗州劉言與淮賊通連差指揮使鄭玟部領兵士欲併當道鄭玟為軍衆所執奔入武陵劉言尋為諸軍所廢臣已至朗州安撫訖詔劉言勒歸私第委王進達取便安置是月所在州郡奏霖雨連綿漂沒田稼損壞城郭廬舍九月己卯太子少保廬損卒丁酉深州上言樂壽縣兵馬都監杜延熙為戍兵所

害先是齊州保寧郡兵士屯于樂壽都頭劉彥章等殺  
延熙為亂時鄭州開道指揮使張萬友亦屯于樂壽然  
不與之同朝廷急遣供奉官馬諤省其事諤乃與萬友  
擒彥章等十三人斬之餘衆奔齊州是月多陰暄木再  
華冬十月戊申朔詔以來年正月一日有事于南郊諸  
道州府不得以進奉南郊為名輒有率歛已酉右金吾  
上將軍張彥成卒庚戌以前同州節度使薛懷讓為左  
屯衛上將軍以尚書左丞兼判國子監田敏權判太常



卿以禮部尚書王易權兵部尚書太常奏郊廟社稷壇位制度請下所司修奉從之以中書令馮道為南郊大禮使以開封尹晉王榮為頓遞使權兵部尚書王易為鹵簿使御史中丞張煦為儀仗使權判太常卿田敏為禮儀使以前潁州防禦使郭瓊為權宗正卿甲寅以前光祿卿丁知浚復為光祿卿丙辰幸南莊西莊己未前寧州刺史張建武責授右司禦副率以野雞族失利故也以前翰林學士工部侍郎魚崇諒為禮部侍郎充翰

林學士時崇諒解職于陝州就養至是再除禁職仍賜  
詔召之令本州給行裝鞍馬侍親歸朝以太子賓客張  
昭為戶部尚書以太子賓客李濤為刑部尚書詔中書  
令馮道赴西京迎奉太廟神主甲子中書令馮道率百  
官上尊號曰聖明文武仁德皇帝答詔不允凡三上章  
允之仍俟郊禮畢施行壬申鄴都邢洺等州皆上言地  
震鄴都尤甚十一月辛巳廢共城稻田務任人佃蒔乙  
酉日南至帝不受朝賀庚寅鎮州節度使何福進奏乞

朝覲三奏允之詔侍衛步軍都指揮使曹英權知鎮州  
軍府事癸巳以將作監李瓊為濟州刺史壬寅詔重定  
天下縣邑除畿赤外其餘三千戶已上為望縣二千戶  
已上為緊縣一千戶已上為上縣五百戶已上為中縣  
不滿五百戶為中下縣十二月戊申雨木冰是日四廟  
神主至西郊帝郊迎奠饗奉神主入于太廟設奠安神  
而退壬子前單州刺史趙鳳賜死坐為民所訟故也甲  
寅詔諸道州府縣鎮城內人戶舊請蠶鹽徵價起今後

竝停甲子鎮州節度使何福進來朝乙丑鄴都畱守王  
殷來朝丙寅禮儀使奏皇帝郊廟行事請以晉王榮為  
亞獻通攝終獻行事從之己巳左補闕王伸停任坐檢  
田于亳州虛憑紐配故也辛未鄴都畱守侍衛親軍都  
指揮使王殷削奪在身官爵長流登州尋賜死于北郊  
其家人骨肉竝不問罪癸酉帝宿齋于崇元殿為來年  
正月一日親祀南郊也時帝已不豫甲戌宿于太廟乙  
亥質明帝親饗太廟自齋宮乘步輦至廟庭被袞冕令

近臣翼侍陞階止及一室行禮俛首而退餘命晉王率  
有司終其禮是日車駕赴郊宮顯德元年春正月丙子  
朔帝親祀圜丘禮畢詣郊宮受賀車駕還宮御明德樓  
宣制大赦天下改廣順四年為顯德元年自正月一日  
昧爽已前應犯罪人常赦所不原者咸赦除之内外將  
士各優給文武職官竝與加恩内外命婦竝與進封寺  
監攝官七周年已上者同明經出身今後諸寺監不得  
以白身署攝升朝官兩任已上著綠十五周年與賜緋

著緋十五年與賜紫州縣官曾經五度參選雖未及十六考與授朝散大夫階年七十已上授優散官賜緋應奉郊廟職掌人員竝與恩澤今後不得以梁朝及清泰朝為偽朝偽主天下帝王陵廟及名臣墳墓無後官為檢校云宣赦畢帝御崇元殿受冊尊號禮畢羣臣稱賀時帝郊祀御樓受冊有司多畧其禮以帝不豫故也先是有占者言鎮星在角房乃鄭宋之分當京師之地兼氏宿主帝王晏寢若散財以致福遷幸以避災庶幾可

以驅攘矣帝以遷幸煩費不可輕議散財可矣故有郊  
禋之命洎歲暮帝疾增劇郊廟之禮蓋勉而行之耳戊  
寅詔廢鄴都依舊為天雄軍大名府在京兆府之下庚  
辰制皇子開封尹晉王榮可開府儀同三司檢校太尉  
兼侍中行開封尹功德使判內外兵馬事襄州安審琦  
進封陳王鄆州符彥卿進封衛王移鎮天雄軍荆南高  
保融進封南平王夏州李彝興進封西平王甲申宋州  
趙暉進封韓國公青州常思進封萊國公徐州王晏進

封滕國公鄧州侯章進封申國公西京武行德進封譙國公許州郭從義加檢校太師鳳翔王景進封褒國公華州孫方諫進封蕭國公自趙暉已下竝加開府儀同三司乙酉分命朝臣往諸州開倉減價出糶以濟饑民詔潭州依舊為大都督府在朗州桂州之上丙戌以澶州節度使鄭仁誨為樞密使加同平章事鄜州楊信加開府儀同三司進封杞國公邠州折從阮加開封儀同三司改封鄭國公滄州李暉加檢校太尉安州李洪義



加檢校太師貝州王饒加檢校太尉以陳州節度使兼  
侍衛馬軍都指揮使郭崇為澶州節度使加同平章事  
以曹州節度使兼侍衛步軍都指揮使曹英為鎮州節  
度使加同平章事潭州王進達加特進兼侍中河陽劉  
訥加檢校太尉河中王彥超加同平章事以鎮州節度  
使何福進為鄆州節度使加同平章事潞州李筠加同  
平章事戊子晉州藥元福滑州白重贊相州王進同州  
張鐸並加檢校太傅以延州節度使索萬進為曹州節

度使加檢校太傅定州畱後孫行友邢州畱後田景咸  
陝州畱後韓通靈武畱後馮繼業竝正授節度使庚寅  
夜東北有大星墜其聲如雷壬辰宰臣馮道加守太師  
范質加尚書左僕射監修國史李穀加右僕射集賢殿  
大學士以端明殿學士尚書戶部侍郎王溥為中書侍  
郎平章事東都事畧太祖將太漸促召學士草制以溥  
為中書侍郎同中書門下平章事已宣制太  
祖曰吾  
無恨矣司徒竇貞固進封汧國公司空蘇禹珪進封莒  
國公竝加開府儀同三司以宣徽南院使知永興軍府

事袁義為延州節度使以宣徽北院使兼樞密副使王仁鎬為永興軍節度使以前安州節度使王令溫為陳州節度使以殿前都指揮使泗州防禦使李重進為武信軍節度使檢校太保典軍如故以龍捷左鑲都指揮使睦州防禦使樊愛能為侍衛馬軍都指揮使洋州節度使加檢校太保以虎捷左鑲都指揮使果州防禦使何徽為侍衛步軍都指揮使利州節度使加檢校太保以樞密承旨魏仁浦為樞密副使是日巳時帝崩于滋

德殿聖壽五十一祕不發喪已未遷神柩于萬歲殿召文武百官班于殿庭宣遺制晉王榮可于柩前即皇帝位服紀月日一如舊制云是歲自正月朔日後景色昏暗日月多暈及嗣君即位之日天氣晴朗中外肅然帝自郊禋後其疾乍瘳乍劇晉王省侍不離左右

東都事畧李重

進周太祖之甥母即福慶長公主重進年長于世宗及太祖寢疾召重進受顧命令拜世宗以定君臣之分

累諭晉王曰我若不起此疾汝即速治山陵不得久畱殿內陵所務從儉素應緣山陵役力人匠竝須和雇不

計近遠不得差配百姓陵寢不須用石柱費人功只以  
甄代之用瓦棺紙衣臨入陵之時召近稅戶三十家為  
陵戶下事前揭開瓦棺徧視過陵內切不得傷他人命  
勿修下宮不要守陵宮人亦不得用石人石獸只立一  
石記子鐫字云大周天子臨晏駕與嗣帝約緣平生好  
儉素只令著瓦棺紙衣葬若違此言陰靈不相助又言  
朕收河府時見李家十八帝陵園廣費錢物人力竝  
遭開發汝不聞漢文帝儉素葬在霸陵原至今見在如

每年寒食無事時即仰量事差人灑掃如無人去只遙  
祭兼仰于河府魏府各奠一副劔甲澶州奠通天冠絳  
紗袍東京奠一副平天冠袞龍服千萬千萬莫忘朕言

二月甲子太常卿田敏上尊諡曰聖神恭肅文武孝皇  
帝廟號太祖四月乙巳葬于嵩陵宰臣李穀撰諡冊文

王溥撰哀冊文

五代史補高祖之為樞密使也每出入

色一緋一綠高祖以為不祥深憂之及河中鳳翔永興  
等處反詔命高祖征之一舉而二鎮瓦解自是權傾天  
下論者以為功高不賞郭氏其危乎高祖聞而恐懼居  
無何忽覩前導者服色緋者改紫綠者改緋高祖心始

安曰彼二人者但見其升不見其降吉兆也未幾遂為三軍所推戴高祖之入京師也三軍分擾殺人爭物者不可勝數時有趙童子者知書善射至防禦使覩其紛擾竊憤之乃大呼于衆中曰樞密太尉志在除君側以安國所謂兵以義舉鼠輩敢爾乃賊也豈太尉意耶于是持弓矢于所居巷口據牀坐凡軍人之來侵犯者皆殺之由是居人賴以保全僅數千家其間亦有致金帛于門下用為報答已堆集如邱陵焉童子見而笑曰吾豈求利者耶于是盡歸其主高祖聞而異之陰謂世宗曰吾聞人間識云趙氏合當為天子觀此人才畧度量近之矣不早除去吾與汝其可保乎使人誣告收付御史府劾而誅之洎高祖厭世未十年而皇宋有天下趙氏之讖乃應于斯知王者不死信矣哉高祖征李守貞軍次河上高祖慮其爭濟臨岸而諭之未及坐忽有羣鴉噪于上高祖退十餘步引弓將射之矢未及發而岸崩其釁裂之勢在高祖足下高祖棄弓顧羣鴉而笑曰

得非天使汝驚動吾耶如此則李守貞不足破矣于是  
三軍欣然各懷鬪志矣五代史闕文周太祖在漢隱帝  
朝為樞密使將兵伐河中李守貞時馮道守太師不與  
朝政以請告周祖謁道于私第問伐蒲策道辭以不在  
其位不敢議國事周祖固問之道不得已謂周祖曰相  
公頗知博乎周祖微時好蒲博屢以此抵罪疑道譏已  
勃然變色道曰是行亦猶博也夫博財多者氣豪而勝  
財寡者心怯而輸守貞在晉累典禁兵自謂軍情附已  
遂謀反耳今相公誠能不惜官錢廣施惠愛明其賞罰  
使軍心許國則守貞不足慮也周祖曰恭聞命矣故伐  
蒲之役周祖以便宜從事卒成大功然亦軍旅歸心終  
移漢祚又周祖自鄴起兵赴闕漢隱帝兵敗遇害于劉  
子陂周祖入京師百官謁周祖見道猶設拜意道便行  
推戴道受拜如平時徐曰侍中此行不易周祖氣沮故  
禪代之謀稍緩及請道詣徐州冊湘陰公為漢嗣道曰  
侍中由衷乎周祖設誓道曰莫教老夫為謬語令為謬



語人臣謹案周世宗朝詔諭史臣史臣曰周太祖昔在修周祖實錄故道之事所宜諱矣

初潛未聞多譽洎西平蒲阪北鎮鄴臺有統御之勞顯英偉之量旋屬漢道斯季天命有歸總虎旅以盪神京不無慙德攬龍圖而登帝位遂闡皇風晷月而弊政皆除逾歲而羣情大服何遷善之如是蓋應變以無窮者也所以魯國充徒望風而散并門遺孽引日偷生及鼎駕之將昇命瓦棺而薄葬勤儉之美終始可稱雖享國之非長亦開基之有裕矣然而二王之誅議者譏其不

能駕馭權豪傷于猜忍卜年斯促抑有由焉

舊五代史卷一百十三

舊五代史卷一百十三攷證

周太祖紀四又殺牛族素與野雞族有憾六月壬子滄  
州奏契丹幽州權監制置使兼防州刺史知盧臺軍事  
張藏英以本軍歸化案歐陽史作秋七月張藏英來  
奔殺牛族原本作殺牛于族攷通鑑五代會要宋史  
東都事略俱作殺牛族知原本于字衍今刪

以前西京留守莒國公王守恩為左衛上將軍王守恩  
原本作守恩原本作守思今據通鑑改正

舊五代史卷一百十三攷證